



L'emprendissadi da mazler na fan betg uschè blers mats.



Camiuns han er sveglià l'interes da quels trais mats.



In spazzachamin dat infurmaziuns ad in mat interessà.



Sin il program è er stada ina revista da moda.



Daniel Wasescha dad RTR en discussiun cun duas mattas.



Mirader, er ina professiun per ina matta.

Tut en tut in bun mussavia

Exposiziun professiunala «Fiutscher»

DA GION NUTEGN STGIER / ANR

■ **Bunamain 3500 scolars e scolaras e vitiers passa 7000 visitaders ha la quarta ediziun da l'exposiziun da professiuns attratg da mesemna fin dumengia. L'occurrènza ha ina giada dapli confermà la vasta paletta che mattas e mats han er en il Grischnun per far lur emprendissadi ubain ina scolaziun supplementara.** Dapi il 2010 han gi lieu trais exposiziuns professiunals «Fiutscher» ed ier è ida a fin la quarta ediziun da quella occurrènza. Ils organisaturs, l'Unìun grischuna d'artisanadi e mastergn, han fatg ina bilantscha positiva cun esser stada l'exposiziun da professiun in vair success. L'interess per quella è stà fitg grond cun vegnir ils passa 10 000 visitaders da tut las regiuns dal Grischnun ed er anc dals chantuns vischins. Tranter ils numerus visitaders sa chapescha blers giuvenils als quals l'occurrènza sa drizza. L'intent da l'exposiziun professiunala «Fiutscher» è da far a scolars e scolars da la scola superiura pli simpel la tscherna per far in emprendissadi ubain ina ulteriura scolaziun. Per mintga mat e mintga matta è quai ina decisiun impurtanta en lur vita ed er ina ulteriura etappa suenter las scolas fundametalas. Cun far cun success in emprendissadi fan mattas e mats in fundament da gronda valur per lur via professiunala, gea schizunt per l'entira vita.

Far attent a las bleras professiuns manualas

Senza dubi tutga la Svizra en Europa tar in da quels pajais cun ina scolaziun exemplarica sco strusch in'otra. La scolaziun professiunala da basa è tar nus Svizzers in



En singuls stans han ils giuvenils gist lavurà al lieu.

da quels sistems che funcziuna grondius ed als quals chantuns e confederaziun dattan blera muntada. Mintg'onn termineschan en Svizra vers 70 000 mats e mattas lur emprendissadi e vitiers vegnan anc 26 000 giuvenils che fan cun success l'examen en ina da las scolas professiunals superiuras. En il Grischnun stattan a disposiziun mintg'onn 1800 plazzas d'emprendissadi, dentant occupadas vegnan deplorablaiman be 1200. Sco en auters chantuns renunzian er tar nus blers mats e bleras mattas da far in emprendissadi, persuerter per ina scolaziun academica. Cun l'exposiziun professiunala «Fiutscher» lessan l'Unìun grischuna d'artisanadi e mastergn, autras organisaziuns da professiun e patrums far attent als giuvenils la vasta pussaivladad da far in emprendissadi en ina da las 80 branschas differentas cun ina schelta da 300 diversas clamadas, cunzunt er professiuns manualas.

Lavurar gist al lieu

Ils tschintg dis da l'exposiziun è stà bler travagl en la halla da la citad da Cuira ed en la gronda tenda. Simpatic è segir er stà che patrums ed emprendists han dà pled e fatg als 3500 giuvenils ed auters interessads. Ils scolars e la scolaras han er gi chaschun da lavurar gist al lieu e da far experientschas cun intgins materials. Professiuns manualas sco scrinari, mirader ubain mecanist han attratg il gust da blers mats, quai ch'è er d'attribuir a las professiuns che han en ina moda dar far cun tecnica ubain cun computers. Da far in emprendissadi mercantil è anc adina in giavisch da bleras mattas, dentant er da daventar rgirunza da malsaus, ubain ina outra professiun en il sectur da sanadad. Tut en tut ina exposiziun professiunala multifara ch'è stada in bun mussavia per mintga mat e matta che sa decida a la fin da far in emprendissadi.



In discurs tranter trais Sursilvans: Armon Bearth, Vendelin Cabernard e Kai Hinrichsen (da san.).

FOTOS G. N. STGIER